

解縣志

宿松徐嗣甲署



解縣志卷之十一

營建考


自古勞民之事莫甚於興土木然有時

不得不興

者若城池衙署學校倉儲道路堤坊隨時建修勞  
民正所以治民也昔子產治鄭首重興修凡以整  
齊人心宣揚治道悉於是乎在倘聽其缺略而任  
其傾頽焉是不治之國也作營建考

城池

縣城周圍九里十三步凡四門東曰長樂西曰順城南



白鎮山北曰永安一云創自前元一云明洪武初築  
言氏舊志謂隋大業九年自解梁故城徙治於此五  
代漢改州宋為防禦金為軍元至正間監郡事者重  
修明洪武初展築景泰間知州張輅復修成化宏治  
間知州張甯李溥加修正德間知州李文敏大修高  
六丈厚三丈五尺池濶十丈深二丈五尺四門各建  
城樓四隅各建角樓嘉靖三十四年知州王惟甯甑  
甑堞口天啟間知州徐文煒建城上鋪舍後傾廢清  
朝乾隆十二年知州韓桐詳請修築二十七年知州

言如泗重修北城并門洞甃甃道光二十七年知州  
陳景曾因遭荒旱詳請重修以工代賑同治十年知  
州朱燠從北城外墻建立兩廡樓凡歲修四關門洞  
譙樓係四關居民分修土身甃堞係四鄉居民分修  
每年正月點充鄉約新舊接替隨時補葺城上刻石  
為界韓文有重修解州城記其文曰

正德庚午秋古汲李公文敏字惟聰陞守解凡政  
有裨補者輒急於舉行士勸於習民安於業未幾  
畿甸草寇竊發延蔓至數千餘人縱橫真保及山



東河南等郡縣搶殺攻圍燬官民屋宇越明年勢  
滋熾由景德而南轉掠山西徑趨翼城相距本郡  
僅百里許公乃繕城浚濠募力士設武備嚴號令  
明賞罰與民守之以死自誓盜聞遂北遁不敢犯  
而一郡保無他虞一日公召士大夫並耆宿語之  
曰邦本莫先於民而衛民莫先於城嘗考諸郡志  
州城創自先元迄今逾二百年矣風雨飄損雉堞  
傾圮且規制低薄不堪保障邇者羣盜聞風遠避  
吾人得脫鋒鏑之難也實僥倖耳釋今不圖安保

將來於是白理齋御史羅山胡公仲善案行所屬  
安邑等縣各集工夫並力修築石伐於山木採於  
林甃陶於野其或料物弗給者侯自為處分仍推  
本郡舉人閻輔監生侯相董其役而侯實朝夕督  
之用是納度有方程勸有法民不知出財之費工  
不憚服役之勞直若子趨父事者然甫兩月工即  
告成傳所謂以佚道使民雖勞不怨者信不誣也  
夫城周匝廣袤仍舊而壯偉森嚴實數倍於舊立  
石用垂不朽竊惟大易於萃以戒不虞而重擊折

之制固有取諸豫蓋居安慮危思患預防以為弭  
奸禦暴計耳噫凡我郡邑之民其尚思公之所以  
興舉之由及士大夫者宿立石之意且俾後人享  
其利於無窮者亦不敢忘其所自云

言氏曰舊志謂解城寥濶多曠野居民不當堦口  
者十之三即高深足據尚難與守矧累土卑薄其  
北隅逼近鹽池鹹鹵易剝修築無虛日何恃以無  
恐然則歲修之法守土者勿視為具文可耳

縣署

在城鎮山坊字民街北南面隋大業九年自解梁城移  
此五代漢始置解州治於解縣之舊治遷解縣於州  
北後廢修不常無考元至正三年重修明洪武四年  
知州洪範八年知州魯執中陸續增修成化間知州  
張甯重修成化末知州張鉞始建後堂宏治九年知  
州李溥顏曰梅花堂十年建儀門三楹十一年知州  
程觀重建治廳五楹儀門幕宇吏舍皆拓其址十五  
年知州趙忠重修改六房吏舍在儀門內東西分列  
清康熙元年知州呂兆璜重修又於署中建樓五楹



五十六年知州陳時重建鐘鼓樓文明門保釐坊乾隆二十年知州張鎮重修衙署建東槐樹亭三間又以後宅低窪培土築基高二丈繚以崇垣改建後堂五楹署後形勢始振乾隆二十六年知州言如泗合署內外更加修治大門外環以木柵啟二門東曰六城保障西曰兩海屏藩增築坊基重建保釐坊往來車馬皆行坊外又修建文明門署前規模益壯統計衙署前後正屋凡七層兩廊吏舍凡十六楹東為蕭曹廟廟左為官廳縣庫在大堂西監獄在儀門內署



東為來鶴軒前後三層共計九楹又東為槐樹亭三楹署西為幕宇又西為疏圃即潺湲亭舊址中為馬王廟廚房在川堂之東轉左即為後圃有土地廟同治十三年知州沈大謨改修更衙前木柵為磚圍墻大門內兩旁增設差役房拆大堂前捲棚民國元年知事龐全震改修至六年知事徐嘉清蒞任始置衙署一切器具邑紳袁履泰作記其文曰

國家設官分職坐堂皇敷教化其出治之地非整齊嚴肅不足以統攝人心如解縣衙署在前清末

時已破爛不堪急待修葺歷任寄居貢院民國之初地方多事貢院為往來駐防軍隊佔居行政長官以城隍廟為辦公住所行政既多不便房室亦嫌湫隘元年五月前知事龐公全震到任教育會會長李芳珍君提議重修衙署由縣咨行到縣議會由議長袁履泰副議長薛篤棊會同第一科科長孫晉陞第二科科長趙琦磋商辦法衆謂款項籌定再議動工經由縣議會議決借用志誠公局銀千餘兩動用解糧生息銀二千兩動用發當

生息銀一千兩採材購料確有把握又由縣咨行到會以秦為總監修以李芳珍王臨灃為監修以馬秉乾為督工員拆去舊日二堂仍作二堂視材木可用者用之間架較前為小兩旁多增耳房拆去舊日三堂仍作三堂東西為辦公室中為會客廳廳屏門之後改為長院以為官眷住居之所拆去舊日東上院另建全院一區以為辦公人員住居之所拆去舊日槐陰堂另蓋北屋數間以為地方官住賓之所最後及於舊大堂自審力薄不克竣

商學志卷之二十一  
工上則苫蓋覆瓦而重新之下則用二立木以撐  
持舊梁因陋就簡猶用銀至四千餘兩之鉅不可  
不謂之民國後一大建築也是工也開始於元年  
冬間落成於二年秋間規模雖具器用未備六年  
五月 徐公嘉清到任見署內賃借人物按季出  
錢所費不少物歸烏有於是始籌款三百餘元招  
工製造棹椅几杌等物共一百一十九件以備存  
案移交則署內房屋器具於是乎大備矣是工成  
後已六年之久無人提起紀實勒石事 徐公命



秦為文紀之秦愧不文不能曲述事之顛末然以  
官紳苦心經營閱時至一年之久而未備迨徐  
公蒞任而始適觀厥成焉豈不難哉是為記

### 吏目署

舊在縣治儀門內西乾隆二十八年知州言如泗率吏  
目韓極重修嘉慶二十年地震圯因移縣治東州判  
舊署現警察所馬隊駐內

### 儒學署

舊設在文廟後歷金元兩代不易至明嘉靖十七年侍



御何瑞山同知州解情移建於文廟西統計明倫堂  
五楹東西學舍各三楹明倫堂東南為射圃西南有  
宰殺亭三楹明倫堂前為二門又前為大門大門前  
為照墻明倫堂後為學正宅大門內西為訓導宅自  
科舉停後民國肇建儒學舊地鞠為茂草今知事徐  
嘉清建設學校林

儒學署之南有田百餘畝舊日養贍書斗者今知事  
徐嘉清建設官桑園

長樂巡檢司

舊在縣城東北十里鹽池北姚家庄康熙八年移建中  
村

鹽池巡檢司

在縣城東南二十里蠶坊村東南

駐防外委千總署

在縣治東今為警察事務所

僧正司

在縣治西北興福寺

道正司

在崇寧宮西首乾隆二十八年重修

試院

在縣學東即西分司舊署址雍正三年州改直隸知州許日熾童紱先後督率紳士捐建凡為正堂為川堂為寢為軒為書室為庖廚堂前東西號舍茶房班房又前為儀門為大門為官廳轅門鼓亭罔不具備乾隆十年知州彭洙又加修葺乾隆十三年知州韓桐又建半舫齋先是考棚在安邑許童兩守創建州城試院學院按臨安邑諸生援請仍其舊嗣經彭守詳

請上憲建議安邑分棚係屬下邑該州請於州城另  
立考棚體制甚合安邑士民不得互相爭執議遂定  
自後歲科兩試皆在解州而蒲屬就近間亦附焉乾  
隆丁亥年知州博文鼎建大堂前捲棚道光丙申年  
知州徐麗生重修大堂並堂前捲棚咸豐四年知州  
張世煇大修自科舉停後廢棄不用民國初建地方  
多事過往兵差輒住其內房舍被其毀壞坍塌不堪  
今將殘木破瓦變作官價售賣地基作官秦園矣

#### 四縣公館



在縣治儀門內西即前吏目署基址道光二十八年知州陳景曾建今州改為縣不轄四縣賓館已改為公款局矣

按舊志有女鹽監在縣治西南解鹽使司在縣治西馬驛在善利坊稅課局在縣治西北司候司在崇凝坊鹽運分司舊署在儒學左明成化二十二年知州張華建後改試院鹽運舊司在城內崇凝坊鹽場舊址在鎮山坊察院舊署在禮賢坊街北布政分司署在縣治南府公館在縣治東內有轉



使高昌閻閻公惠政碑又有府廳公館在縣治東  
陰陽學在縣治南醫學在鎮山坊後俱廢

### 倉舍

在州署西常平倉及社倉義倉舊共計四十間歲久將  
圯光緒七年知州馬丕瑤改建北廡七楹額曰豫儲  
東西廡各五楹俱額曰萬斯南建磚洞於中以通車  
道左右各建向北磚洞廡二左曰崇曰墉右曰比曰  
櫛擇東北吉地移建倉神廟三楹豎通衙署門樓一  
間西北除郡人捐輸地基外又買地基一分八釐以

擴放倉上倉車馬停留之所通外大門改建作磚洞  
門樓門內東邊重修小廡三楹額曰因門外西邊重  
建倉役房三間自捐俸銀二百兩郡人馬邁伯捐經  
費銀一千兩王儒林捐鄰倉地基二分雷鎮南捐鄰  
倉地基一分五釐今知事徐嘉清改為監獄工場

### 同善義倉

在風化源頭東清光緒乙未年創建規模宏大建置十  
八廡後設倉神廟三楹今存穀無多房舍空濶洗心  
分社農學會模範示教分會皆在其內

養濟院

舊在禮賢坊街東後移東關外如意菴右首正房廂房  
共計十六間額設孤貧十九名乾隆二十七年知州  
言如泗增額外孤貧十一名後增額久廢祇存正額  
十九名民國肇建正額亦廢

倉聖廟

在文廟西清光緒庚寅邑紳李修德捐建以縣人士來  
城應試僦屋維艱創建試館築房六十餘間為寒士  
寓舍正室供設倉額位人故呼之為倉聖廟停考後

角身不... 三二一  
改建模範學校今為女子蠶桑傳習所

### 橋梁

通利橋在西門外二里跨大水澗土人名石橋路通蒲  
陝古有石板明宏治十六年縣人侯竣闢清改造大  
石橋今為砂壓

西門橋在城西門外今廢

南門橋在南門外康熙間建今廢

金井橋在城西北十六里跨姚暹渠鹽車通路故歲修  
歸鹽運司土人名侯村橋



鳳尾橋在城西十五里賈村鳳尾堰後廢

郇瑕橋在城北十五里近郇瑕舊城土人名羅叉橋迤  
東有鸞橋麻村橋俱跨姚暹渠

凍水橋在城西北三十里三樓村接虞鄉坑頭鎮

龍居橋在城東北十五里龍居村明萬曆十六年建清  
雍正四年分司王又樸乾隆四年分司鄧釗二十五  
年州守張鎮疊修

公共體育場

在縣城西門外舊日校武場地民國八年九月知事徐



角集志書 卷之十一  
嘉清創設自為文記其事文曰

解縣縣城西門外舊日之校軍場今日之公共體  
育場也際此競爭時代使人人有尚武精神則體  
育尚焉縣治商民繁庶居人衆多若無寬廣地址  
體育無由普及則公共體育場尚焉然使地方遼  
僻來往多艱或逼近民居演習不便籌思至再惟  
城西校場最為適宜無如多年廢置已成瓦礫之  
場坑坎不平砂石成堆治之良非易易乃商之學  
界人員悉心籌度派員監修高者剷之低者填之

斬其叢莽除其污穢然後平如坻矣又鋪以黃土圍以柵欄計東西廣一十五丈南北袤二十八丈共面積四千二百方丈於西北隅設場門內置鞦韆鐵槓浪橋平台底欄跳高跳遠暨一切運動必需器具無不全備斯役也經始於八年七月至九月初始告厥成共用工料費銀三百二十元並於門額標其名曰解縣公共體育場凡在各校學生自可隨時操練並擬定每年春秋二季招集高等國民各校學生定期聯合運動任人觀覽此外各

商學三言 卷之二 一  
界人民均准入場自由運動不加禁止蓋人民為  
國家之主腦必人人有強健之身體然後有強健  
之國家此場附近城關局勢濶大凡我商民當操  
作閒暇之時或招同志或引青年咸集場中擇其  
心之所好力之所能者以習練而比較之明優勝  
劣敗之理堅自強不息之心鍛鍊其筋骨活潑其  
精神顯以收養生之效隱以興愛國之忱斯不負  
此場之成立亦不負經營此場之苦心也於爾商  
民有厚望焉謹將此場之方向建設之原因勒之

石上尤望後之來者隨時修葺而補充之則幸甚矣

### 第二高小校

在縣城西北鄉大井村民國九年七月知事徐嘉清建築自為文記其事文曰

解縣全境共分三區高小學校亦設有三處平均每區有高小學校一處惟第二校校址在第一區之南賈村西近虞鄉東接縣城南逼條山北薄硝池限於地勢招生困難况第一區有高小校二處



而第三區地廣人稠反無一處未免偏枯擬將第二高小校移建第三區使一區各有一高小校如此分配體制亦符招生較易故於去年五月間會集閭縣各界人員幾經討論擇定第三區大井村之文昌廟為建築第二高小校地點惟地址狹小不敷展佈幸有該村侯甲駉等九人所立崇實會積有平地六畝願捐為該校校址熱心公益殊堪嘉許即於本年六月十六日動工派馬君慎齋督修任君周楨副之限三箇月竣工所需建築費即

以第二高小校原有校產及靜林寺破房估價洋一千六百七十元各村拍賣破廟洋三千零二十八元並九年上忙留用一半畝捐洋一千四百一十二元統共六千餘元工程告竣墻宇聿新按全縣教育計畫足敷國民學生升學之用三校鼎立各宏教育學務當蒸蒸日上矣竊維學校之設為國家造人材即為地方培元氣解縣第三區分縣治西北土地平行物產豐美人民亦樸實耐苦農業而外無他進取當茲競爭時代襲常蹈舊故步

自封患貧患弱何以生存於今日世界惟學焉以  
化之灌輸新識破除故智將見彼都人士日進文  
明家庭教育與社會教育均以學校教育為中堅  
焉從此畢業者或為國家棟梁之材或作地方自  
治之選民權鞏固國勢擴張吾於該校有厚望焉  
爰誌其移建巔末而勒之石

論曰土木之興勞民力傷民財苟非萬不得已必  
不敢輕於一試然以利民用以厚民生往往興大  
工動大眾民且樂為之恨無官為之提倡也則力

雖勞而力日紆財雖傷而財日裕試觀井田初畫  
溝洫畎疇之制經數十百年之經營而始成此偉  
大之規模更無論興築之小小者今民國肇建百  
廢待興凡為吾民建永久之業謀樂利之庥即有  
營造民亦必歡忻鼓舞踴躍從公矣如曰此方築  
一臺可以壯觀瞻彼方營一塔可以補風水此猶  
是流俗之見作無益以害有益而又強民為之怨  
聲載道其亦可以不必矣





沿革考

革去故鼎取新歷代建制有創有因或非其舊名而範圍甚大或仍其舊名而割截分隸因時制宜各有深意世分升降有時倚為重鎮號聲名文物之邦有時視為下邑等顛輿小邦之例循名責實可以識變遷改易之由作沿革考

解州於虞夏時為畿內地實冀州之域周武王封其第

十五弟於縣北為郇國

在縣北三十五里一名郇瑕杜註河東解縣西北有郇城

春秋時晉獻公滅魏以其地為解梁城後又以賜大夫

畢萬

左傳惠公許秦河外五城內及解梁即其地也

戰國時屬魏戰國策秦敗魏師於解即解梁也

秦始皇二十二年滅魏為河東郡

西漢初置解縣屬河東郡

河東郡二十四縣解為第四

武帝元封五年分天下為十三部部置刺史各一人解

縣屬司隸校尉部河東郡

昭帝始元元年改屬并州刺史部新莽天鳳元年改河

東為北陽郡置州牧部監解縣屬州牧部監北陽郡

東漢光武建武元年解縣復屬京師司隸部河東郡

魏少帝正始八年以司隸所部三河宏農並冀州之平

陽合五郡置司州領之解縣屬司州河東郡

晉武帝太康元年分天下為十九州省司隸仍置河東

郡解縣屬之

晉河東郡九縣解為第七

後魏析置安定縣西魏太和元年改曰南解縣隸秦州

河東郡又改綏化郡又曰虞鄉

太和元年分臨晉為北解縣

隋為虞鄉縣隸河東郡

隸者十縣虞鄉為第九

唐高祖武德二年更名解縣為次畿屬虞州

今安邑縣

別置

虞鄉縣於蒲解之界

即今虞鄉縣



貞觀十七年廢虞州以解縣省入虞鄉二十二年復置

解縣隸河中府今蒲州

五代後漢高祖乾祐元年九月始置解州治解縣并割

河中之間喜安邑二縣來屬之舊志乾祐九月乃隱帝非高祖

宋改為中州解為中縣先屬河東路後改屬陝西永興

軍路置防禦領三縣解中間喜望安邑繁

金初置解梁郡軍隸河東南路後廢為上刺史解縣為

倚宣宗貞祐二年復陞為節鎮軍名寶昌又為豐寶

興寶二軍因鹽利名興定四年徙治平陸縣

元仍名解州為下州解縣為下縣兼置司候司世祖至  
元四年以芮城併入平陸司候併入解梁隸平陽路  
成宗元正初復分置平陸芮城領六縣如金舊總隸晉  
甯路總管府

明以解縣入州隸平陽府轄五縣曰安邑夏縣聞喜平  
陸芮城

清初因明舊雍正二年九月陞改直隸州定為繁難題  
缺析平陽府之安邑夏縣平陸芮城垣曲來屬之七  
年又析垣曲隸絳州於是領縣四曰安邑夏縣平陸

芮城編戶三十里

民國肇建復改為縣屬河東道與西漢時無異

職官沿革附

漢有縣令縣尉兼主簿事儒學官各一員

隋有縣令縣尉兼主簿事都水監儒學官各一員

唐有縣令一員兼知兩池事縣尉兼主簿事儒學  
官各一員

後五代漢改縣為州知州同知兼兩池權鹽事州

判吏目儒學各一員

宋復改州為縣有令尉儒學各一員

金陞為解梁郡軍有節度使一員同知節度使一員副使一員觀察判官一員

元為州隸晉甯路解鹽司二人州達魯花赤一人知州一人解縣達魯花赤一人解縣尹一人州同知判官二人州學正二人縣教諭一人

明仍為州省解縣知州同知州判吏目儒學學正各一員訓導三員長樂司鹽池司巡檢各一員稅課大使一員陰陽典術醫學典科僧道正各



一員

清設知州一員學正訓導吏目各一員長樂司鹽

池司巡檢各一員

兩巡檢自乾隆二十九年奉文改隸鹽法衙門雍正

二年改州為直隸州改知州為直隸知州九年

添設州判一員

乾隆二十七年移駐安邑縣運城

民國復改為縣縣分三區設縣知事一員區長警

佐三員各兼職第一區警佐兼區長第二第三

區區長兼警佐

馬氏舊志曰解本渤海去水名其地郇魏諸姬載

在國詩春秋解梁為晉內地予大夫萬至斯乃浸  
大要亦畢公高之餘烈也郡縣以後或析或省而  
徙今治而置郡置軍及設防禦節度各從時宜益  
稱巨鎮其仍為州則自元以來名亦如故揆厥大  
勢蓋南臨陝虢東襟汾絳西接蒲津誠河東重地  
云

介氏舊志曰古魏本姬姓國鄭元詩譜云在禹貢  
冀州雷首之北析城之西南枕河曲北涉汾水朱  
子註魏詩引鄭譜更補之曰今河中府解州即其

地也地理志雷首在蒲坂即條山之首曰北則在其陰也析城在獲澤之西南獲澤在今汾晉間是解為古魏無疑乃或又以為在平陸縣北則以金徙治平陸故或以為在安邑縣則以魏徙治安邑故又曰春秋時解為解梁臨晉為桑泉地本密邇相隣然各瓜分碁置至漢置解縣則合而為一迄魏晉不改西魏太和間始置南解縣析臨晉為北解縣岐而二焉至今兩處所轄地仍有犬牙相入者蓋其合也久矣

論曰解縣多以為古魏地殊未詳考古魏地大約

在析城濩澤之交近汾晉間觀魏風彼汾一方置

河之干汾水即近汾水之處解縣去汾水百數十

里魏地狹隘必不及此晉獻公滅魏以其地為解

梁城此正古魏地雖名解梁非今日解縣之地惟

左傳秦納重耳濟河圍令狐入桑泉取臼衰杜註

解縣東南有臼城此是漢之解縣正是今日解縣之地西

漢置解縣範圍甚大統今之臨虞兩縣漢書地理

志無臨虞兩縣可知後分南北解北解即今之臨



晉南解合虞鄉解縣而言又名虞鄉縣後從虞鄉  
縣分置解州始完全為今日之解縣面石門之嶺  
背鳴條之崗外則砥柱之險內則鹽池之饒大河  
繞其南汾水帶其北與安邑毘連為河東奧區戰  
國時魏失安邑韓即無上黨三晉之禍始於失河  
外成於亡安邑

安邑即今夏縣安邑兩縣地為  
故都魏故都解縣為州時屬焉

解縣志卷之十二

古蹟考

古人不可見古事不可知有蹟存焉居今稽古矣  
若祠宇若冢墓若亭館渺渺芳徽代遠年湮有不  
埋沒於荒煙蔓草者乎彙而錄之後之人過其地  
者正如傷故都而詠黍稷思美政而愛甘棠俯仰  
流連不勝抗懷今昔之感况後之視今亦猶今之  
視昔人壽幾何遺名不朽作古蹟考

先農壇

在縣東門外雍正五年奉文建立道光戊申知州陳景  
曾重建

社稷壇

在縣西門外關廟西南霽壇附祭乾隆二十八年知州

言如泗修

風雲雷雨山川城隍壇

在縣西門外關廟西南乾隆二十八年知州言如泗移  
建

文廟

在城內東南隅統計大成殿七楹兩旁通後角門二楹  
兩廡各十二楹東西庫房各二楹戟門三楹東西角  
門各三楹戟門前為泮池環月臺池前為櫺星門又  
前為照牆左右甃圍花牆啟左右柵門二左曰濤海  
騰蛟右曰條山起鳳金大定二十八年知州李愈重  
修元元統元年知州耿允囂重修明洪武四年知州  
洪範十六年州判余尹瞻正統六年知州吳惠正德  
四年知州李昆皆重修礮石為欄干環月臺嘉靖三  
年知州林元澍重修清康熙三十九年學正馬允愷



重修兩廡五十四年知州陳時捐俸倡修並葺名宦  
鄉賢等祠乾隆二十八年知州言如泗重修嘉慶間  
知州胡龍光大修道光五年知州張秀芝重修同治  
八年知州朱煥重修兩廡庫房戟門櫺星門民國七  
年知事徐嘉清重修清副貢楊學洛作記其文曰

竊以天地之大生民之衆智愚強弱至不一致其  
交接往來各相安於無事者賴此綱常名教以繩  
範而維繫之大矣哉聖人之道洵所謂懿範百王  
師表萬世者也慨自世風日變邪說蓬興以守禮

為無用以叛道為能為甚且謂孔子為千古之罪  
人廟祀乃愚民之迷信此等狂吠原無傷於聖道  
之高深第恐無知之人輕聽盲從愚者誤入歧途  
黠者日恣橫議勢不至人道淪亡人類滅絕而不  
止吁可畏也解邑為古帝王之域素稱禮讓之邦  
城東南隅原有

文廟一區規模宏敞堂陛崇峻祇以年久失修墻  
宇半多傾圮丁巳孟夏江北徐公嘉清奉檄宰斯  
邑下車伊始以整飭紀綱講求道德為急務然欲

定斯民之趨向必先示以率由之正軌景仰之儀  
型則

文廟之重修不容少緩無如十數年來新政滂興  
公款告竭而地方窮苦籌集維艱於是邀集城鄉  
諸士紳妥籌商確百計圖維計得千金以鳩工而  
庀材焉即於是年孟冬經始開工傾者葺之缺者  
補之其不適宜者移置而重新之越明年仲春工  
竣斯役也雖非創建然設置補苴又值民窮財竭  
之時實已大費經營矣洛燕南下士時以書生佐

縣幕當仲春禘奠之期往觀其盛竊見殿宇宏崇  
光華煥發助祭諸君與凡執事之人皆欣欣有喜  
色於以知徐公與諸君之亟亟於為此者非徒以  
壯觀瞻寔欲以維聖道而正人心也後之官此土  
者其亦體此意以隨時修葺之俾斯民知聖道之  
大尊守之而不敢或踰中國前途庶有身乎是為

記

崇聖祠

在文廟東清雍正元年改啟聖為崇聖嗣因祠宇傾圮



民國七年知事徐嘉清移祀於尊經閣原祠地址改為苗圃矣

名宦祠

在戟門外左西嚮民國七年知事徐嘉清重修

鄉賢祠

在戟門外右東嚮民國七年知事徐嘉清重修

忠義孝弟祠

在鄉賢祠南東嚮民國七年知事徐嘉清重修

節孝祠

在儒學西民國七年知事徐嘉清重修

尊經閣

在文廟後民國七年知事徐嘉清改為崇聖祠

關聖廟

在城西門外南面條山北負硝池創自陳隋宋大中祥符間重建元祐七年知州張杲之修金世宗大定三年管軍范公重修泰和四年重修元泰定元年重修至正二十五年郡人蔡榮等重修明洪熙元年重修成化十四年知州張甯重修正德五年知州李文敏

重修嘉靖間巡按王秀重修知州孔天敘重修知州  
解情重修樂樓知州樊問仁重修三十七年地震廟  
毀知州王維甯重建隆慶間重修午門重修樂樓萬  
曆間建麟經閣十八年勅解州廟額英烈三十六年  
重修三十八年勅修清康熙四年陝撫曲沃賈漢復  
重修四十一年壬午四月朔二日巳時廟災至午刻  
焚燬無餘五十二年壬辰知州海甯祝增遵復舊制  
雍正十二年果親王謁廟指寫聖像讚云春秋大義  
炳如日星心無愧怍義斯昭明巍巍夫子華嶽英靈

浩氣充塞方寸精瑩宜乎百世樽俎常馨繪此儀容  
仰止丹誠又敬留詩云英風貫金石壯節植綱常廟  
食徧天下神棲歸故鄉平生一片心皎如赤日光當  
其忠義發直欲凌太行萬古春秋志惟公升其堂入  
廟瞻遺像雲旆儼飛揚乾隆十八年知州韓桐大加  
修葺二十七年知州言如泗改八卦樓為御書樓又  
改麟經閣前樓為刀印兩樓釐正匾額修理東西大  
坊廟南改建結義園功德祠又於廟西大路北建立  
關夫子故里碑亭統計廟制前大坊一曰萬古綱常



南峙輒門門外琉璃甃壁坊東西鐘鼓兩樓又東為  
義壯乾坤坊西為威震華夏坊中為大門凡五楹旁  
啟門二曰文經曰武緯門後即樂樓也凡三楹又進  
為午門凡五楹左右坊二曰丹誠貫日曰正氣參天  
又進為山海鍾靈坊為御書樓上下凡五楹又進為  
崇寧殿周檐石楹脊刻螭龍凡二十有六東為官廳  
西為官庫其東偏則果親王碑亭在焉殿後寢宮凡  
五楹東西配廟各三楹又後為氣肅千秋坊麟經閣  
上下凡九楹東西夾刀印兩樓閣後即厚載門長垣

繚之東西廊各九十五楹壁繪聖跡規制宏麗甲天下嘉慶十四年河東道劉大觀知州吳邦治倡率河東各屬捐俸並勸募客商紳民共集銀二萬八千餘兩統廟內外重新之增建正殿西鐘亭大門外廊房三十餘間並照壁兩旁花牆咸豐十一年知州葉桂芬重修聖母殿午門刀印樓咸豐同治間河東道楊鐵臣李慶翔共籌銀七千兩知州葉桂芬程豫朱煥同郡庠生董清海前後共籌銀一萬七千餘兩豫命董清海等督工重建春秋樓並修各殿宇樓亭及大門

角門內外牌坊廊房八年朱煥接修至九年工竣光緒  
元年知州沈大謨重修鼓樓光緒三年義壯乾坤坊災未  
建光緒九年大門及樂樓鐘鼓樓皆燬於火知州張喜田  
重建清末大門樂樓午門及東廊房十餘門被焚連年  
興修略復舊制今年徐知事籌款督建午門大工已動  
命郡人曲迺銳作記其文曰

國家崇尚武功錫封神帝號勅建廟制一如帝  
制帝有午門神亦有午門所以隆體制兼以肅  
觀瞻也解縣為神之故里廟制甲天下午門壯

麗喬皇與廟相配自清末祝融肆虐蕩為灰燼當時延燒大門樂樓及東西遊廊數十間近年次第興修規復舊制然已竭罄棉薄矣午門一役十餘年來終未有敢言建築者誠以工程廓大籌款維艱非得強有力者為之提倡萬難集事幸我知事

徐公蒞任是邦入廟展拜瞻望咨嗟進士紳而問其故士紳有殷殷懇請公慨然曰是余之責也汝第鳩工庀材我當有以籌之先撥志誠公局加增三成房租益之以該局存款二千元再將貢院



萬壽宮房屋地基作價購買以資補助有此巨款  
尅日興工開始於九年正月且告督工士紳繪舊  
日午門規制圖以進遂按圖指示曰此制甚好今  
仍舊貫毋侈於前毋狹於後侈於前無財不可狹  
於後不足以配廟制汝第率作興事款苟不足惟  
余是責總期聿觀厥成而後已吾因之有感矣世  
之建大工動大衆非有堅忍卓絕之志與夫強毅  
果敢之力終不能底於有成古人障大水墜高山  
自後視之羣以為若有神助而不知古人為之亦

行無所事也特志與力之迫不猶人耳是役也將  
歸功於紳歟籌畫多年而有志未逮將歸功於官  
歟官未出宦囊之一錢將歸功於神歟神聰  
明正直依人而興仍不能有所作為乃茲之美輪  
美奐鳥革翬飛者伊誰之功耶毋亦紳借官力官  
資紳助官紳俱有功耶抑神亦默默呵護揚風  
架木因雨成泥助人之樂事赴功耶然吾終願歸  
功於熱心公益之官藉非官力恐吾紳築室道謀  
有憚其難而躊躇中止者而神之靈爽無所憑

依今何幸遇吾賢知事而豐功告竣也知事名嘉  
清字景夷姓徐氏江蘇贛榆縣人

### 城隍廟

在縣治崇凝坊街北建自五代漢乾祐間明正德五年  
知州李惟聰修嘉靖間州守徐祚重修旋以地震傾  
圮州守趙文緒再葺萬曆二十一年州守王道正修  
萬曆庚戌鄉民胡肯收胡彥威等重修清順治間霖  
雨頽廢州守呂兆璜修康熙二十年州守萬象重修  
雍正間州守孔傳忠許日熾童紱相繼修統計大門

五楹樂樓三楹正殿三楹前為獻殿後為寢宮東西  
兩廊各十八楹地藏三曹縣屬城隍以次配列乾隆  
五十三年知州范永證重修道光三年知州徐承慶  
重修同治八年知州朱煥重修兩廊及樂樓民國肇  
造行政官以衙署敗爛權寓其內多所興修

### 五龍廟

在縣南中條山麓五龍峪左

二月二日分  
雨澤於此

宋淳化三年

知州田紹斌張珣修金天會八年知州郭企忠大定  
十年同知耶律德元太和六年知州田特秀元至正



三年郡人治中薛信明宣德間知州戚甯皆重修正  
德七年知州李文敏增修清同治庚午知州朱煥重  
修歌舞樓

### 龍王廟

在城內崇凝坊乾隆二十九年知州言如泗創建嘉慶  
癸酉知州秦鏊同治八年知州朱煥皆重修

### 文昌廟

在儒學東正殿三楹二門三楹乾隆二十七年知州言  
如泗創建嘉慶十四年知州吳邦治於殿後建啟聖

祠三楹咸豐二年知州張世煇重修正殿四年創建  
大門三楹民國七年知事徐嘉清重修

### 文昌閣

在城上東南隅康熙庚子重建閣凡二層乾隆二十七  
年知州言如泗增為三層

### 火星廟

在縣治南鎮山坊

### 后土廟

一在縣南五里中條山麓創建未詳一在縣西北二十

五里大井村北今名金井廟宋至道元年縣令李煥  
修明嘉靖九年里人重修隆慶五年重修萬曆二十  
三年大修清乾隆四十八年重修同治十三年重修  
今為一大市場棉粟牲畜極為繁盛稅捐年取數千  
金為吾解進款大宗現第三區行政公所駐內

### 成寶公廟

在分雲嶺神尸鹽澤宋景德間建

### 風聖廟

舊在縣東五里條山之陰後圯基址古柏尚存明嘉靖

丙寅州守呂文南即東郊八蜡廟遺址重建清道光  
庚子年山西巡撫世襲一等侯楊國楨重修大殿丁  
未年知州陳景曾重修樂樓大門並涿鹿元勛坊侯  
居民作記文曰

軒轅黃帝氏相姓風名后解其故里也廟舊建於  
城東南五里其來遠矣嘉靖丙寅關中呂侯文南  
奉命來守茲土始至謁廟見規制湫隘日漸傾圮  
又地里遠僻非以肅神靈便祀事即欲新之未果  
比三年廢者舉蠱者飭利興而弊革政成而民安



通謀諸鄉士大夫卜地於東郊即八蜡廟遺址為  
之申畫示勸鳩工聚材不旬月而畢役繚垣雲甍  
飛簷翼張重門穹閣邃宇雕甍窅窅燿燿奕奕堂  
堂營繕之功於斯為盛予惟風后者隆古之神聖  
其生也鍾條山醜海之英其出也應黃帝夢寐之  
感配上台之尊為軒轅之師上繼羲農之治後天  
以成務下啟堯舜之傳先天以開人民未宮室相  
以制之民未器用相以作之制度文為之未備相  
以創立之凡仰觀天道俯察地宜神化宜民由於

黃帝裁成者悉有以輔相之史稱黃帝得六相而  
天地治神明至神實為之首大矣哉其開闢之元  
勛乎天下後世之沐其澤者莫不景仰不特一鄉  
之人爾也且吾鄉以功德記者上古有神三國有  
漢壽亭侯侯以武而勘禍亂廟建於西郭象天地  
嚴凝之氣神以文而綏太平今遷廟於東郭象天  
地溫和之氣前人之建豎意若有待今日之修舉  
事實相因時之所值者既異而才之所應者不同  
文武無異道聖賢有全能今聖朝方以隆古之道

治天下薄海內外咸底休風則是廟之新匪徒崇  
神聖於既往而聖朝至治之意亦有以熙於無窮  
矣其闕係夫豈鮮哉是役也經始於隆慶庚午季  
春落成於是年八月正殿三楹轉互重以簷廊大  
門三楹外樹坊牌題曰開闢首相風神廟若夫工  
費督助大凡則列諸碑陰

### 藥王廟

在風聖廟東光緒五年八月廟災正殿享殿及創建重  
修碑記俱被焚僅留大門樂樓社東等三村於六月

七月重建

舜廟

在縣東北三十里趙村楊迺舜歌南風賦其詞曰

巍巍舜德於今人稱居北極而惟大歌南風以敷  
宏歌之伊何制絲桐而合奏風之至矣信長育而  
有徵茲可謂無為而自理天縱而多能美夫誠深  
發衷物能應感憫沃瘠之勞逸均陰陽之舒慘是  
用作則於世利之孔多風詠凱兮美萬物之蕃衍  
樂操琴也佳五聲以同和復而不厭遠而匪他方



將煦嫗之為意豈徒娛樂於斯歌觀其發宮應徵  
揚清激濁自南習習同詩人喻彼棘心入夜泠泠  
異貧士叩其牛角則知聖人審音以知政化俗而  
作樂者有以夫懿其出乎幽谷應以繁聲若雲龍  
之潛召同律呂之相生萬籟動八音清匪鳴條而  
扇物方靡草而作程是以人和時康功歸帝力四  
氣以之而不撓百穀從茲而繁殖節有度守有則  
始從通而及遠終自南而徂北爾乃匪徐匪疾乍  
過乍聞颯颯輕音疑少女之初至泠泠餘韻謂別

鶴之求羣亦謂父母之周極何必聲變而成文是  
以德冠百王致成萬物正南面而恭已懋功千載  
不啻

### 三聖廟

在趙村辛化里祀堯舜禹三聖清康熙五十七年村人  
重修

### 關廟崇聖祠

在關廟東掖門內壬午廟災祠亦毀康熙五十二年壬  
辰重建雍正五年進封關聖三代為公

光昭公裕昌  
公成忠公

角鼎志書 卷之十一  
郡縣胥立廟春秋二仲祀以少牢咸豐五年追封光  
昭王裕昌王成忠王同治八年知州朱煥重修

### 關廟部將祠

在廟東大門外舊祠部將周倉趙累王甫三人乾隆二  
十八年知州言如泗建議周倉廖化配立午門兩旁  
祠內增入功曹楊儀仍為部將祠西有追風伯祠即  
赤兔馬云同治八年重修

### 關廟結義園

在關廟南舊為蓮華池明萬曆間知州張起龍濬池栽

蓮建亭三楹清知州張鎮重修乾隆二十七年知州  
言如泗更建三義閣薰風亭穿渠引水疊石成山廣  
栽竹樹蔚然深秀門外有坊亭以翼之改額結義園  
刻石為圖供閣中嘉慶己巳年知州吳邦治重修道  
光四年知州張秀之重修君子亭同治八年知州朱  
煥重修三義閣君子亭並東西蓮池現改為第一模  
範國民學校

關聖故里廟

在縣東常平里下馮村距城二十里相傳為關聖故宅



去闕聖祖塋里許廟中有塔坑立明嘉靖三十四年  
知州事前御史徐祚重修四十四年知州陳秉正修  
是年署事州同賈永康申請鹽院胡鑰議動香需辦  
祭每清明節一祀墳墓一祀本廟歲以為例隆慶二  
年知州呂文南重修萬曆二十一年知州魏養蒙重  
修四十五年鹽院王遠宜重修清康熙十二年鹽院  
何元英暨知州陳士性重修二十八年巡鹽御史郝  
惟謙重修乾隆二十八年知州言如泗於寢宮後重  
建祖廟五楹大門三楹崇祀始祖龍逢公暨三代光

昭王裕昌王成忠王西首舊祠改為官廳嘉慶十九年河東道陳中孚重修二十五年知州胡龍光重修道光十五年河東道但明倫重修二十三年知州徐麗生重修關聖祖塋二十九年知州陳景曾籌款命侯爾昌等重修同治九年知州朱煥重修言如泗創建關聖祖廟記其文曰

常平為關聖故宅廟貌巋然東距安邑玉鈎山夏忠諫大夫諱龍逢公墓四十餘里南對條山石磬溝祖壠裁一里許忠魂毅魄於是乎萃我國家欽

崇義烈追封關聖三代為光昭公裕昌公成忠公  
載在春秋祀典周敦或懈乾隆壬午如泗奉命守  
聖故里城西大廟增修完備親詣常平見廟左有  
塔塔下有井相傳聖父母避難瘞葬處所有司春  
秋展墓後則致祭於廟西庠屋中非所以慰聖孝  
而崇先烈也環視廟中見寢宮後基址隆然兩廡  
材木瓦石全積乃知康熙四十一年議建祖殿曾  
築臺基因大廟回祿未獲興舉乾隆二十二年  
前守張公甫經購材仍復中止如泗瞿然因即舊創

建祖廟中祀勅封光昭裕昌成忠三公配以三代  
聖母並祀忠諫大夫以為藝祖不特忠肝義膽一  
脉流衍崇祀一堂後先輝映且禮以義起庶幾於  
古者報本追遠之禘制以逮我朝崇德報功之盛  
典似有合焉而闕聖在天之靈諒亦降鑒在茲也  
然則世之稱聖者曰忠曰義曰信曰勇莫有稱其  
孝者今也松楸無恙桑梓依然明德維馨孝思不  
匱歷千百年而瞻故宅仰新宮如見公世濟忠貞  
同符合節焉如泗以先賢蔭守晉有年敬宗崇祖



備官其敢忘諸從茲駿奔祖廟孔慎且肅教孝教  
忠吾民有觀感興起者聖澤留遺何莫非歷祖開  
先常平一里與條山巖海流峙千古可耳時乾隆  
二十八年三月吉日

有韓老人者河南人僑寓廟傍以傭工餘資捐栽廟中  
柏樹百餘株經營數年已拱把矣又捐學款修山路建  
焚字紙樓老人無妻子累傭工所得一身衣食外盡  
數捐辦公益知事徐公嘉清重其人自為碑記表揚  
之其文曰

余於民國六年五月捧檄來宰解梁下車之後周  
歷縣屬各村鄉以視察其風俗人情且以覘鄉校  
焉城之東南鄉有常平村漢壽亭侯故里家廟在  
焉廟西有小學校一處閱校冊註有韓老人捐銀  
五兩心竊異之入廟參謁見殿宇廊舍半皆傾圮  
亟宜設法修治廟之前後左右有新種柏樹百餘  
株葱蘢修整已拱把矣詢之村人僉曰此廟內外  
以及關帝祖塋四圍神道兩旁並其他廟宇共  
樹一百六十九株皆韓老人所手植者問老人何

在曰僑寓本村命招至蚩蚩然農人也問其種樹之緣起與夫栽培之方法老人曰某於前清光緒初年因家貧無衣食資受傭來解佃田耕焉計終年所獲除捐助學校基本金外銖積寸累少有贏餘竊謂人生斯世各宜有所建立吾儕農人雖無大作用然量己之力盡己之心未始不可以自効况某孑然一身無內顧憂因見闕廟及祖塋兩處樹皆古老氣象蕭疏其外隙地尚多隨時補栽既足以壯觀瞻復足以備利用因出資購柏秧數

百株相其地而栽植之其初一二次以種不得法  
無一活者乃竭慮研究至第三次親往山中選購  
樹秧先以紙條誌其方向復以水灌之使渥透然  
後掘起多帶泥土包以麥秸繫以繩索不令樹根  
見日透風栽之於三尺深一尺寬之土窩中擁土  
覆水水沃土密則無不活矣余聞其言深有味乎  
其人焉夫掘秧如此其慎所謂培其根也栽秧如  
此其勤所謂養其實也豈徒活一樹哉無事不可  
成也當告以現在講求實業而局紳種樹多不能



活爾既得法願到局為之襄助且為爾請獎焉老人曰某野人不慣與官紳俱且老矣行將回籍深恐客死他鄉獎敘一事尤非夙願至種樹之法前言已備如法行之無不效非別有謬巧也言罷望望而去余嘆息間村人又進言曰老人又修黃草坡路二十餘里此路由常平通平陸皆石底狹小不通馱轎老人日鑿數步三四月而成行人甚便又創設甄字紙樓一座諸多善行夫馬負千鈞蟻駝一粒苟盡其力之所能到均有益於人世若老

人者幼未讀書長復負苦乃能節衣縮食熱心公益原其初志非藉此以弋美名牟大利其孳孳為善之心求之晚近士大夫且不易得而老農優為之噫是可以風矣爰記其語言事蹟勒之貞珉並諭村人切實保護俾老人姓名與斯事相終古焉此即余之所以報老人也亦即余之所以勸邑人也老人者何河南浙川縣毛家溝韓志寬也

### 張桓侯廟

在縣東北二十里龍居村明嘉靖二十七年建三十年

晉陽親藩號松柏主人賈金詣廟侯先示夢於鄉人  
頗著靈異現改為第三高等小學校

### 二忠祠

在龍居村祀關聖張桓侯明洪武初郡人王德捐地建  
嘉靖四年德孫守春增修

### 張公祠

祀漢博望侯張騫在縣西十五里底張村

### 柳呂二公祠

在縣衙門南原北面祀唐柳宗元明呂柟江闔作記其

詞曰

解州舊有柳呂祠在城北隅廢廣慈寺西鞠為茂  
草久矣柳諱宗元字子厚官終柳州刺史生於唐  
解人也呂諱柟字仲木號涇野謚文簡官終南京  
禮部右侍郎生於明高陵人也文簡祀於嘉靖二  
十二年癸卯子厚之祠不知所始以憲宗元和十  
四年卒迄今幾九百年中歷五季宋金元明兵燹  
數見其祠興廢固宜文簡之去今纔一百五六十  
年明末雖經寇氛非五季比遂至一椽不存何哉



說者曰往哲之廢祠也非關時代之遠近治亂多  
因後至者與為廢興耳惟是二公一推文章一崇  
理學其並祀不無疑焉文簡之謫於解也解之丁  
徭昔數倍他邑常力請上官均去十之五偕知州  
林元敘就廣慈寺廢址創祠祀一州五縣先賢自  
有熊風后始下至元之岐裕齋凡三十一人既又  
增劉宋柳元景訖明成化王文八人訖至解人聚  
哭於祠衰服二十七日良有以也考文簡生平在  
武宗朝疏請還宮寢預儲貳朝兩宮遣義子世宗

朝大禮議起與時不合亡何奉修省詔上十三事  
自劾忤旨下獄考訊尋謫解州判官宜乎邑人高  
朝用以顏子稱之于厚為文昌黎稱其議論證據  
今古出入經史百子衡湘以南為進士者皆以子  
厚為師經其指畫悉有法度可觀又曰才不為世  
用道不行於時昌黎許之也如此且謂子厚治柳  
州禁州人男女質錢沒為奴婢盡得贖不能贖者  
計庸歸質觀察因下其法於他州比一歲免歸者  
千人先此出為刺史劉夢得亦在遺當詣播州子

厚念夢得母老願以柳易播今之指天日誓死生  
者聞子厚之風亦可少媿矣又追溯其先代夔以  
得罪武后死高宗朝父鎮初以不媚權貴失御史  
及復為御史號剛直昌黎重其人並及其所自出  
所許又不獨文章明矣世每以王叔文一事少之  
考貞元十九年子厚拜監察御史而王叔文韋執  
誼用事拜禮部員外郎叔文等敗因坐黨不聞其  
有依附顯迹當必有不白之隱否則昌黎未易許  
人何獨許之如是並祠而祀之夫何疑哉余以康

熙三十一年壬申七月抵州方匝月夜夢一莪冠  
儒者遇諸野藉地坐談半晌既覺記憶吾師漁洋  
先生別時曾謂曰呂文簡理學名臣也曾謫解州  
有無祠祀幸無忽因思藉地者殆以露處相告耶  
亟欲舉厥事而未遑歲甲戌乃闢州西南隙地別  
構三楹繚以垣樹以重門木石瓦甃共費若干凡  
皆余自備始事於甲戌十二月落成於乙亥六月  
因之為記

賢守祠



在保釐坊東祀州守魏養蒙徐文煒鄒蘊賢呂兆璜韓  
應恒韓桐

考舊志魏徐鄒三公舊有專祠歲久圯廢州守江闔  
改建於保釐坊東西向更額曰賢守祠增入呂韓二  
公後有良牧例得附入乾隆二十七年州守言如泗  
增入前守武安韓公

### 興福寺

在縣治西北崇凝坊宋乾興元年建明洪武間置僧正  
司併廣慈石牛二寺入焉歲久圯移建城隍廟街西

更名新寺

靜林寺

在縣西二十里中條山陰唐乾甯中錫名妙覺宋太平  
興國三年易名靜林山天甯寺慶厯中僧普真增修  
元祐三年郡人將作監主簿婁應父子與僧洪濟元  
杲繼修元至正三年重修清雍正九年州守許日熾  
重修寺有羅漢洞後有閣在崇巖上紅臉溝泉自寺  
東偏山頂流遶而北四圍皆古柏蒼松夕照入林霞  
光映射杜陵所謂松門似畫圖也王基靜林山興化

寺記其文曰

中條山靜林谷蒲坂舊地也有古寺載於圖經唐  
乾甯中錫名妙覺後漢乾祐初始屬於解至本朝  
太平興國二年易以今名歷歲寢久頽屋壞垣莫  
之能興慶厯中有僧號普真者雲遊至此徘徊周  
覽愛其山川可為住錫之地乃營庵於側鄉人知  
其篤行相與營建殿閣創修甃塔繼絳僧文玉與  
普真同志棲隱斯地乃度地之勢以廣寺之基日  
修月葺講論有堂燕息有室於是二人復請於官

乞奏以十方為名朝廷從之至是歲時設齋大會  
環千里之內外衣冠士女雲集輻輳其盛遂與棲  
嚴萬固三刹相埒而為解地之勝遊歷三十年而  
正殿獨闕有沙門洪濟者繼為主僧慨然建立乃  
告於有力者郡人試將作監王簿婁應與濟相善  
獨力承修遂聚材鳩工克成善果迺刻盧舍那像  
以中居之而廡舍未畢洪濟化去婁君亦卒其子  
綬念先人志遵釋氏教與王僧元杲繼而成之增  
廣廊廡七十餘間費幾萬餘緡一出婁氏至是左



右上下粲然備具予嘉前後主僧得人其所以用心如此又歎婁氏父子相承若彼因述此寺肇興之迹而為誌其歲月以告後人云時元祐三年十  
二月初一記嗣因該寺為土匪潛藏之所地方士  
紳呈請拆毀以絕賊巢轉奉省令照准民國九年  
拆作建築第二高小學校之用

### 歸起寺

在縣西北三十里三樓村元魏間建歷代重修近寺建  
三樓故其里因以三樓名焉

石牛寺

在縣東北三十里趙村俗名趙村寺元至正間建明萬曆二十三年修州人侯亮予作記其文曰

余髫年時即從事於鄒魯業青牛白象氏俱未暇理焉釋褐後始得以公餘繙閱諸子以侈域外觀瞿曇家說方及目矣其五千四十八卷中總之欲藉旁門而窺堂奧走捷徑而會都城也人之虛士二大洲者樂此之為逕往往割去塵緣求為頭陀以希大覺氏即儼然鉅儒亦有稱楞嚴首軸為奇

書歎儒門淡泊而欣然屈服者釋老宣尼世鼎足  
焉吾解自元至正靜林石牛已欲創矣州之東北  
隅數叢林者必於石牛屈一指焉其正殿三穩對  
峙而南者觀音殿也又有南山門遠豎與天王殿  
相屹立院列東西者二臺廳而下齋舍排貫週圍  
垣墉百堵奇諸優婆塞日捧誦呪其中凡旅過  
而環聽者無不稱勝概也迄國朝宏正間業已就  
頽嘉靖中葉復值坤震益為土木一大厄殿寢剝  
落古馨張子妙香請梵音得魚山遺韻恐象教從



茲墜也力為補葺大祲之後難奏完修其徒天真  
馬子悟純染翰類懷素性姿類惠能醫述通枝水  
講法叅禪又得竺乾大人之真印無論禪門中稱  
第一流即縉紳先生亦不辭而闢之叅白社議風  
旛者亦時有焉廣結檀越周恢前績易朽以堅甍  
宇以瑠甃臺以甃丹墁堊塗簷阿華彩赫然又若  
甲囊時持籌計費約可數百金特一呼諾而辨二  
氏之菩提慈帆素著闔浮若斯也釋門中可謂夙  
世功果真了緣矣倘嗣後五戒常尊六根常淨金



剛不爍般若不昧無壞爾年尼珠懸靈明鏡於無  
影樹脫塵八化挑雙履見西方主者余與子會於  
葱嶺之陰將共飯香積浴蘭而還傳子之能得衣  
鉢於庶人子其無忘先祝焉余因諸文學楊君應  
仁景君可樂狀君聚奎姚君茂華之請特用司馬  
公解禪六偈之說書之於碑以為石牛記時萬曆  
二十三年歲次乙未秋孟浴佛之後五日也

洪福寺

在西曲樊村金大定三年奉勅建有碑

僧耨寺

古稱靜林下院在長江府北

崇寧宮

在縣西門外關廟左元至元三年姜真人建明洪武間

置道正司嘉靖三年道正楊衍澄增修

元帝殿

在縣治北秦康坊街東

三清殿

在關廟崇寧宮左久圯康熙九年知州陳士性修建

紫泉監

唐志解有紫泉監乾元元年置

權鹽院

在縣治西五代漢置

風后故里

黃帝得風后於海隅登以為相海隅即今解池西南隅

甘泉亭

在縣西關廟中其井二眼味甚甘後人建亭其上

梅花堂

在縣治後明成化末知州張鉞建

### 潺湲亭

在縣治廨宇後宋有史氏父子相繼刺州建亭引水州  
守解情作記其文曰

嘉靖壬寅神居子復謫解梁抵任之日南澌子即  
酌於宅園之亭曰子知亭以潺湲名乎宋史新繼  
父守此引條山之水入內達外厥聲潺湲不絕建  
亭以象以憇其母歲久水涸亭圯予至濟源而導  
之約其散漫復歸於中於是汙者弗積坎者弗止



故道復通潺湲之聲復作自茲及子輩之宅漸被  
於學之泮民之圃人無不悅茲水者因復新其亭  
今而得與吾子之洗心於此也余聞南澣子之為  
政也專務簡約惜民之財與力如惜其心入境而  
猶見茅茨土堦之風然猶葺是亭者非以流近不  
長澤不下究出之無序慈惠不本中壅蕩之咎弗  
可訓耶澡濯同官波激校士潤澤民生斯亭之新  
以人樂固非樂臺池然則是亭也將弗思端本以  
法其源乎善口以效其流乎普濟以象其利乎俾

頌聲之作以配其潺湲乎違則為玩物喪志為厲  
民自樂為小民怨咨之階而亭之所係如此又豈  
獨樂人之樂而已也南澣子曰予始惟惜此水而  
節之以不墜前人規安望其如子言曰節之義大  
矣而子少之乎天道節而歲功成地道節而代有  
終人道節而裁成輔相之責盡節之義大矣子蓋  
少之乎子蓋服節之久相與流通而不自知矣不  
然涇野溪田我明名臣行為天下則也而獨為談  
言以悅耶時判官強君用德等在側余曰神居子

角鼎  
之論理而不口宜記以告登斯亭者時嘉靖癸卯  
春二月吉日

按神居子者高郵王京以太僕丞謫解州同知南  
許子情自號也碑在署中西圃與林元敘碑並峙  
漢博陸侯霍光墓

在縣治東禮賢坊有大塚巡鹽御史張士隆宋延佐題  
石清乾隆二十七年知州言如泗重立墓門按山西  
通志霍光墓在浮山二十里平甯里長安志以霍光  
陪葬咸陽武帝茂陵之左今當以茂陵陪葬為確在

本州者或後嗣思築

關聖先塋

在縣東十八里石磐溝三面條峰前臨鯨海深藏雄秀  
實為誕聖靈區墓麓有關聖祖塋墓道碑又里許有  
常平村古廟相傳為關氏祖宅有塔圮立金大定十  
七年里人王興重修每歲清明十月朔知州親祭塔  
下有井俗稱關聖避難出亡時其父母沉葬於內後  
人建塔表之墓址東至黑嘴懷西至發鼓臺南至青  
石坂北至石梯子高夢說作關聖祖墓碑記其文曰



從來論忠孝者必曰盡忠不能盡孝似忠孝之道不能兩全余竊以為不然何則孝以承先之志為大凡人當平居考業其祖與父必勉之曰爾他日得志務為忠臣勿為佞臣及委贄為臣之日能公爾忘私國爾忘家祖與父未有不色喜者喜其能承吾志也不獨此也即千百世後人咸指其祖父之邱壠曰此某忠臣之祖也此某忠臣之父也而為之祖父者亦因以傳之勿替其為孝不亦大乎然古今來盡忠與孝者孰有如關聖也哉聖之廟

貌徧天下精靈塞宇內其當日之忠貞貫日與夫  
豐功偉烈固表表在人耳目間雖狂夫愚婦皆能  
悉數余不具述惟公鍾靈於解而常平原有公之  
祖父兩塋歲時致祭至今不輟但父塋在廟而祖  
塋居條厯代典祭者憚於步艱每望祭神道碑前  
未嘗躬登壠隧且二世字諱及生亡甲子變亂頻  
仍湮沒失傳揆諸聖心何能釋然於懷予轉鹽聖  
里茲春齋誠瞻謁聖像因詢聖之遺跡並其祖父  
邱壠而解州吏目朱仔及長樂司章用中鹽池司

王閏進而言曰聖考諱毅字道遠今之故廟塔即道遠公寃宐之所獨祖塋曾未至焉於戊午之夏郡庠生于昌肄業常平廟適有濬井者得碎瓦神主篆刻隱然急合而讀之上勒云石磐易麟隱士諱審字問之生於漢和帝永元二年庚寅卒於桓帝永壽三年丁酉享年六十有八葬於原著讀處傍勒男毅供乃知為道遠公奉祀厥考之主也又有庠生李倬者素善堪輿徧閱條山中得一佳兆方瞻歎非常有老樵王義過而睨之曰此地幼聞



先人傳是闕聖祖兆豈今人所可越奪者哉遂共  
披滌草壤得舊石供桌下置一碑竟與神主有合  
是以仔等擬將墳臺墓道少為修葺以妥公之靈  
無如力有不逮意欲置設墓簿以徵同心共成盛  
舉尚夫能果云云余聞之不覺肅然而起曰噫聖  
之忠誠大哉然而天下之人僅知聖之忠而不知  
聖之孝也非不知聖之孝以為忠之不能兼及乎  
孝而孝之適足以妨乎忠也審如是也將所謂求  
忠臣於孝子之門者何謂乎故人以忠孝之道分



而二之者余則以忠孝之道合而一之今觀於聖  
信耶非耶人能以敬聖之心轉而敬其祖以慰聖  
之靈其為敬不較勝歟是役也捐貲獨建余宜任  
之但人各有敬聖之心使一人獨任阻衆人向善  
之心也烏乎可愛命三人董其事而余捐貲倡之  
俾衆人羣焉應之勒碑墓側以垂不朽非以之邀  
名也非以之獲福也正欲表聖之忠孝兩全以告  
天下後世之為忠孝者

漢司空王卓墓

在縣西門外大路南省志人物傳漢王卓字仲遠河東  
解人陽嘉三年以光祿勳代孔扶為司空

魏西河郡守贈晉州刺史裴欣墓

欣卒子俠將擇葬地號泣而行空中有人曰童子何悲  
葬於桑東封公侯俠懼以告其母母曰神也吾聞鬼  
神福善爾家未嘗有惡當以吉祥告汝耳時俠宅側  
有大桑林因葬焉

唐衛大經墓

在縣西北今侯村南有土一邱村人相傳以為大經墓

唐開元中姜師度奉詔鑿無鹽河刻室盧濱邱墓甚  
多至衛大經墓發其地得一石刻銘詞曰姜師度更  
移南向三五步工人得之以狀言於姜姜異而嗟歎  
即命遷其河遠墓數十步

無鹽河即姚暹渠

### 宋監簿婁應墓

在縣西南二里中條山陰元祐七年二月七日庚申葬  
元宣撫司儀肅墓

在縣西北十六里侯村附葬祖塋翰林侍制陳學作記  
石碑猶存墓地多年為居人侵佔查無踪迹州守言

如泗因豎碑之傍封一假塚今馬鬣依然而碑為救  
豎毀傷字多剝落

元河東郡公伯德那墓

在縣北二十里曲樊村

元平章政事察罕墓

在縣北五十里

元岐裕齋墓

在縣西北四十里三張村

明刑部司務馬恕墓



在縣北小張村西

戶部尚書趙欽湯墓

在縣北三十里南扶村

延綏巡撫李春光墓

在縣南二里

太僕寺卿趙標墓

在鹽池禁門右

太僕寺卿王明墓

在西胡村黃花峪口

贈光祿寺卿王國訓墓

在胡村南

延安府知府介一清墓

在縣東北大張村

封太常寺少卿孫禮墓

在靜林寺西箭幹嶺

太常寺少卿孫維清墓

在五龍峪西南

贈中憲大夫侯珍墓

雲南道監察御史侯居良墓

太僕寺少卿侯居坤墓

臨城縣知縣侯加亮墓

興安州知州侯加乘墓

俱在縣西閻家村南

關南叅政道李瑱墓

在城西南二里

泗水縣知縣李議墓

在城南

寶豐縣知縣李汝藩墓

在南山任家溝

鞏縣知縣贈中憲大夫侯居震墓

遵義道侯加采墓

三水縣知縣侯加纓墓

俱在白龍峪口

蒲城縣知縣李瑤墓

贈苑馬寺陝西安定監監正李廷桂墓

俱在鎮山門西



苑馬寺陝西安定監監正李冲霄墓

在東胡村西山下

順天府司李侯加地墓

連山縣知縣侯世冑墓

俱在縣南菽子峪口

灤州知州劉從仁墓

在城北硝池北岸

海豐縣知縣劉志仁墓

在城南

戶部員外郎介夢龍墓

在縣東北大張村

贈戶科給事中介元正墓

在縣西閻家村

三水縣知縣侯臣墓

在桃花洞東

贈狄道縣知縣侯邦寧墓

狄道縣知縣侯命墓

俱在縣城南阡

角果六言  
卷之三  
莊浪兵備道李希樸墓

在郊斜村南

孝廉介元善墓

在城南山麓

戶科給事中介松年墓

在靜林寺西

封合肥縣知縣侯嗣晉墓

吏部驗封司員外郎侯佐墓

俱在寺下村東南

清翰林侍讀喬廷桂墓

在硝池北岸

蒙城縣知縣孫啟烈墓

在靜林寺西南山底

邵武府推官馬淑援墓

龍游縣知縣馬允尚墓

俱在縣東北龍居村北

汜水縣知縣贈太僕寺少卿介舜年墓

翰林院檢討介孝璫墓



俱在縣西郊斜村

海鹽縣知縣介孝璿墓子舉人錫祉墓

贈太僕寺少卿介孝瑞墓

俱在縣西閻家村

商水縣知縣李興高墓

宜黃縣知縣李應高墓

俱在桃花洞

封平番縣知縣李禔墓

行唐縣知縣李翔鵠墓

俱在喬家莊

定海縣知縣侯宜人墓

在縣西閣家村南

郟陽縣知縣侯萬里墓

在縣南荻子峪口

兩當縣知縣侯聚貴墓

在桃花洞

封磧山縣知縣李高墓

平涼府同知李本盛墓

隴西縣知縣李迪墓

俱在南山底獮坡

論曰人生不滿百足跡所至耳目所經如雲煙過  
眼一去不留然故址遺蹟猶有可考而知者至於  
一邑之小塚墓登至六七十人毋乃傷濫然嘗詢  
之故老得諸傳聞此數十君子者皆端人正士生  
而卓著政績沒而可祀於鄉者備錄葬處正以見  
吾邑多君子一坏之土後之人過而起敬焉抑亦  
激揚風化之一端也

金石考

吾人得一古碑得一古器必寶而存之者非重其物也重其上有款識可以驗何人手澤又有年月可以知何代所製此亦博覽之一端也又經史流傳帝虎魯魚勢必不免得金石古刻或可藉以訂證經史之訛故考據為專門之學未可缺也作金石考

關聖遺像碑

在西門外廟內相傳為關聖五十三歲真容漢建安年



間所寫面有七痣鬚髯則稀疏而滿頤海內敬奉摹  
搨日不暇給舊碑模糊乾隆二十七年知州言如泗  
重摹上石縣庫內藏漢壽亭侯玉印玉質班駁篆文  
古勁與石刻並重云

唐重修池神祠頌碑

貞元十三年四月知解縣池陸位安邑池韋縱勒碑崔  
教撰文

宋翰林學士王禹偁題鹽池碑

淳化四年孟夏禹偁自商洛移刺解州會宗人太常博

士王洞領池事題五言律一章并序大中祥符三年

四月一日刻石元至元癸酉夏五月二十三日承直

郎總判平陽路事汲郡王惲得壁間王黃州所題解

池詩因和詩三章時偕武略將軍解州達魯花赤王

節武略將軍知州張慶安進義校尉判官張居仁摹

刻宋元兩原碑俱嵌縣署壁王禹偁詩云極望似江

沈漫漫起素波兩池泉下竭千古利還多塲吏輸年

額畦夫奉月課收時車并載種處地先磨碎顆珠凌

亂乾聲玉切磋岸平開雪苑渠滲圻銀河衆鵲齊翔

舞羣羊自寤訛本源皆瀉鹵異號亦鹹醎沫訝浮鷗  
鷺津疑漫蚌螺煮勞輕渤海煎苦笑牂牁雨打重歸  
水菴盛更覆蓑尖風吹作片烈日曬成塚海味知難  
蕃青的不過惠人冷周闕均口賦無頗涿鹿城雖近  
蚩尤血若河有時紅爛熳是處白巖峩潤下終資國  
靈長任蠢哦江梅須待我金鼎始調和王惲詩云解  
梁城下解鹽池萬寶騰光奪日輝我欲大觀窮化窟  
乳泉一賦了天機日融池面爛生紅更有南山障碧  
空一夜高口渾如洗州人說是廣南風物自分留付



後人暗將風雅欲誰親  
琨珠在側知形穢尚友何妨  
繼後塵

元穎川忠襄王廟碑

在縣城南隅至正中孫元撰文云至德十一年妖賊起  
汝南明年陷江淮又明年陷河洛又明年斷函谷關  
據陝州城震擾晉解為州界秦晉交勢引殺函去陝  
咫尺隔一河其州人少長老弱咸大震恐怖懼謂朝  
夕焚溺水火中無舞地矣俄聞穎川王將大兵數萬  
衆轉戰南來拔殺闕直薄陝州城攻圍計數日賊分



遣奇兵渡河北蹂解南鄙王將騎夜渡靈寶要擊於  
安邑南原大破之乘勝逐北數十里抵平陸蹙下陽  
津賊衆爭赴水死無噍類遺城中賊大奪氣會食盡  
棄城乃遁去明年襄樊賊入武關奪秦嶺直犯長安  
王復引兵戰同華再戰秦隴徽鳳大擊破賊走巴蜀  
遂定秦隴又明年春東賊分道突太行陷冀雲中鴈  
門代羣<sub>郡</sub>烽火數千里大掠復南還出故道抵絳及解  
解人復大震恐王復出關渡蒲阪勒兵解之聞喜以  
伺賊賊走南山設伏兵橫擊之賊驚棄輜重散走山

谷虜獲萬計晉冀地悉平歷數年還解境皆兵燹賴  
王力解之民卒脫兵難後二年王靖大梁定中原又  
二年收魯復下齊夏六月薨於軍哀音至解之士民  
及郡守僚屬相聚計議曰天下初發難也羣盜所過  
燔城府殺長吏屠黔黎流毒徧海內罔不殘滅吾解  
梁闔境為完城四野為全民邑里有屋廬父子夫婦  
長幼昆弟有倫飲食有節出入有數抱子弄孫不殊  
平時若是者果誰之賜耶傳曰有功於民國有祀能  
捍災禦患國有祀王有大功活大衆宜世世血食吾

土衆口傳咸應曰安思所危功思所自是謂知報德  
者乃即日擇高阜肇營王廟於乾隅官府捐俸金士  
民輸土木衆樂效役不閱月而告成殿宇巍如廟貌  
儼然兩廡櫺星拱揖左右中條太華掩擁後先莊麗  
雄偉聳甲首郡訖事其同知卜嗣真等走洛陽來文  
於余用刻石以昭不朽吾喜勲業在王室聞望在天  
下德澤在四方復解人感王大德追思感慕永世能  
不忘是可記王名察罕帖木兒字廷瑞沈邱人初監  
汝甯府中書平章政事知河南山東行樞密院事陝

西諸道行御史中丞薨謚忠襄追王穎川其子擴廓  
鐵穆迺繼總大兵允克成功今為大尉中書平章政  
事樞密院事太子詹事家乘國史具載始末茲不錄

云查該廟碑代遠年湮徧訪各處毫無遺跡蓋湮沒也久矣

近人在五龍峪掘出大石一片上書一巖字大可數尺  
筆力遒勁傍書宋元祐年號

論曰解彈丸小邑金石無可表見 闕聖遺像碑

與漢壽亭侯玉印是否漢時真迹代遠年湮無從  
稽考惟有風雨二竹相傳 聖帝在許時所手繪



角身六言  
卷之二  
四  
暗寄昭烈以自明心跡之物寓云不謝東君意丹  
青獨立名莫嫌孤葉淡終久不彫零等語以畫為  
書蓋恐曹之疑己也豈知 帝之為人性情剛直  
心地光明其不肯久留之意已不憚明言一旦辭  
去拜書封賜何等磊磊落落而顧為此暗昧之事  
耶且其筆力薄弱恐為後人所造特以流傳既久  
為海內所欽重茲故表而出之以增邑乘之光云  
爾

